

**Peruntukan tambahan RM147 juta bina istana baru**  
**Malaysiakini.com**  
**October 18, 2010**

Kerajaan persekutuan telah meluluskan peruntukan tambahan RM147 juta untuk pembinaan istana baru di Jalan Duta, Kuala Lumpur.

Ini menjadikan kos keseluruhan pembinaan kompleks Istana Negara sebanyak RM797 juta.

Kos yang ditetapkan sebelum ini untuk membina Kompleks Istana Negara seluas 100,000 meter persegi ialah RM650 juta.

Bagaimanapun, dalam jawapan bertulis kepada Lim Lip Eng (DAP-Segambut), Kementerian Kerja Raya berkata kos itu tidak melibatkan beberapa skop komponen projek yang sepatutnya diambil kira untuk melengkapkan keseluruhan istana tersebut.

"Sehubungan itu, kerajaan telah bersetuju meluluskan peruntukan tambahan RM147 juta, menjadikan keseluruhan projek pembinaan Kompleks Istana Negara ini adalah RM797 juta," katanya.

Menurutnya, tambahan peruntukan itu diperlukan bagi menampung kos-kos yang tidak termasuk dalam kontrak asal.

Ia antaranya termasuk untuk meningkatkan sistem kawalan keselamatan, bayaran 'capital contribution' kepada syarikat-syarikat utiliti dan lain-lain kos berkaitan termasuk hiasan dalaman.

Menurut jawapan itu lagi, pembinaan kompleks Istana Negara memerlukan jalan akses yang sempurna.

Berikutan, kos kontrak bagi pembinaan jalan susur keluar masuk ke Kompleks Istana Negara telah ditetapkan seperti berikut:

1. Persimpangan bertingkat Istana Negara dari/ke Jalan Duta RM106 juta - berbanding dddengan kos asal RM130 juta.
2. Menaik taraf jalan Changkat Semantan (Pintu 2) RM32.5 juta.

Menurut jawapan bertulis itu lagi, kos operasi dan pengurusan Kompleks Istana Negara akan ditentukan setelah keseluruhan projek tu disiapkan sepenuhnya pada 30 Jun tahun depan.